

SENATURAKO BOZAK. Irailaren 23an izanen da bozketa eguna eta Pirinio Atlantikoetan hiru aulki dira betetzeko

EGUNGO SENATARIA



DIDIER BOROTRA

Miarritzeko auzapeza eta Baiona-Angelu-Miarritze aglomerazioko lehendakaria da, Euskal Herriak Frantziako Senatuan duen ordezkari bakarra. Irailaren 23ko bozetan UDF alderdiko zerrendaburua izanen da Didier Borotra. Egungo Senatuan Kanpo afera, defentsa eta indar armatuen batzordean dago eta Frantzia eta Espainia, Mexiko eta Hego Amerikarekiko harremanen taldeko kide da.

Euskal Departamenduaren aldeko zerrenda osatzen ari da Senatuko bozetarako

Jadanik hogeita hamar euskal auzapezek adierazi diote sustengua Urriaren 9ko Deia kolektiboak abiatu duen ekimenari

Hur Gorostiaga | BAIONA

Urriaren 9ko Deia kolektiboa Euskal Departamenduaren aldeko zerrenda bat prestatzen ari da, heldu den irailaren 23an Frantzian eta Ipar Euskal Herrian egingen diren Senaturako hauteskundeetan aurkezteko, EUSKALDUNON EGUNKARIAK jakin ahal izan duenez.

Urriaren 9ko Deia Euskal Departamenduaren aldeko hautesi, alderdikide, sozioprofesional eta herritar xeheek osatzen dute, eta 1999ko urriaren 9an Euskal Departamenduaren aldeko manifestaldi erraldoiaren ondotik osatu zen. Ordezkarri eskuindarretarik hasi eta abertzaleak arte biltzen dituen kolektiboak, bozketen parada ba-

liatu nahi du, Euskal Departamenduaren eskaera berriz planteatzeko.

Zerrenda sortzeko asmoaren berri zabaldu die Lapurdi, Nafarroa Beherea eta Zuberoako 159 auzapezi, eta jadanik 30 auzapezek beren sustengua adierazi diote zerrendari, jakin ahal izan dugunez.

Zerrenda aurkeztuko balitz, orain arteko oreka hausteko arriskua legoke, eta egun Ipar Euskal Herriko senatari bakarra den Didier Borotraren postua kolokan ezar lezake. Hautetsien gehiengo handi bat Euskal Departamenduaren alde agertu

izan da azken urteetan, izan daitezen auzapez edo udal kontseilariak. Bigarren mailako hautesleek —hautetsiak— bozkatzeko dutenez, 30 auzapez, ez da Nolanahiko zifra, beraz. Horretaz jakitun, Didier Borotrak lehen hurbilketak hasi ditu Urriaren 9ko Deiarekin, aterabide adostu baten finkatzeko asmoz. Baina kolektiboak, egungo senatariaren adierazpen edo kokatze argi bat gabe, zailki egingen du bere xedean atzera.

Didier Borotrak hastapen batean Euskal Departamenduaren arrunt kontra zegoela adierazi ondoren, azken urtean ikuspegia malgutu eta «Euskal Departamendua sortuko balitz, kontra ez litzatekeela egonen» adierazi izan du. Baina hala ere «egitura ez egokia» litzatekeela adierazi izan du, Euskal Departamenduaren aldeko ahalegin gehiagorik egin gabe. Justuki, Urriaren 9ko Deiak, Euskal Departamenduari buruzko engaiaimendu finkoak galdeginen dituela espero da, bestela zerrenda atxikiko baitute Didier Borotraren kaltetan.

Gaur egun Didier Borotra da euskal senatari bakarra Frantziako Senatuan, UDF alderdikoa. Pirinio Atlantikoei (Biarroa eta Ipar Euskal Herria) dagozkien gainerako biak RPR alderdikoak dira eta biarnesak: Louis Althape eta Auguste Cazaket.

Borotra, Labarrere eta Espiaube

Oraino kasik bi hilabete eskas badira ere, alderdi nagusiak hasiak dira beren zerrendaburuen izenak hedatzen. UDF alderdiarendako, ez da dudarik Didier Borotra izanen baita burua. RPR alderdiarendako, aldiz, oraino ez dute argitu Althape edo Cazalet izanen den. Hautesmodua aldaturik, RPRk senatari bat gal lezake sozialisten faboretan.

Justuki, alderdi sozialistak Andre Labarrere Pauko auzapez eta diputatua ukanez du zerrendaburu. Barne hauteskunde batzuen ondoren, sozialista militanteek Colette Capdevielle Baionako sozialista eta Euskal Departamenduaren aldekoa zerrendako lehen postuetatik kendu dute.

Komunistek, aldiz, Marie-Josée Espiaube Bokaleko (Lapurdi) alkatea ezarriko dute zerrendaburu. Maurice Garcia Bokaleko kontseilari nagusi komunista ere toki onean joanen da zerrendaren lehen postuetan.

Abertzaleei dagokienez, momentuko Euskal Departamenduaren aldeko zerrenda osatzen ari dira, lanean Urriaren 9ko Deia kolektiboarekin batera.



BOB EDME

Urriaren 9ko Deia kolektiboak deitutako manifestazioa Euskal Departamenduaren alde, 1999ko urriaren 9an Baionan.

HAUTESMOLDEA

Itzuli bakarra eta parekotasunez

Senatuko bozetarako legea aldatu berria da eta bi ondorio nagusi ditu. Batetik, proportzionala izanen da; hots, zerrendak departamendu mailan aurkeztuko direla, eta itzuli bakarrera egingen da. Lehenago, departamenduen baitako hautes barrutietan aurkezten ziren (Pirinio Atlantikoetan hiru hautes barruti) eta bozketa bi itzulira egingen zen barruti bakoitzean, bozka gehien zuten biak bigarren itzulira pasaturik. Heldu den irailaren 23an, beraz, itzuli bakarra izanen da.

Horrez gain, zerrendek parekotasuna errespetatu beharko dute, aurtengo herriko bozetan egin den gisan. Ondorioz, emazte eta gizon kopuru bera izan beharko da eta zerrendako kokapena ere orekatua izan beharko da. Pirinio Atlantikoen tzat aldaketa handirik ez bada sortuko ere (zerrendaburu garrantzitsuenak gizonekoak dira), biztanleria garrantzitsuagoa duten tokietan emakume gehiago sartzen ahalgo dira, gaur egun oso guti baitira Senatuan. Hala ere Senaturako hauteskundeek beren berezitasuna atxikiko dute. Batetik 9 urteko legealdia izanen da, hiru urtero herenez berritzen dena. Orotara 321 senatari dira Frantziako Senatuan.

Bestetik, ez ditu sufragio unibertsal zuzenak hautatzen, bigarren mailako herritarrek baizik. Nolazbait, hautetsien hautesiak dira senatariak. Lapurdi, Nafarroa Beherea eta Zuberoako hautesleak zenbat izanen diren ez dago jakiterik, eman dituzten datu ofizialetan ez baitago Ipar Euskal Herria bereizterik. Hala ere, 700 bat izanen direla pentsa daiteke. Izan ere, diputatu kargua dutenek, kontseilari nagusiek, eskualde kontseilariak, auzapezek eta udal kontseilarien ordezkari hautatuek dute bozkatzeko eskubidea. Azken hauei dagokienez, udal kontseilariak abuztuaren 31n hautatu beharko dituzte beren ordez bozkatzeko duten hautesleak.